



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu: Marsu 2011

Edisaun: 10 Marsu 2011

**Reuniaun Meza Redonda: Papel Autór Judisiáriu iha implementasaun Lei
Kontra Violénsia Doméstika**

Iha loron 04 fulan Marsu tinan 2011, Sekretária Estadu ba Promosaun no Igualidade (SEPI), liu husi departementu monitorizasaun organiza diskusaun meza rodonda hodi halibur instituisaun relevantes iha setór justisa atu ko'alia konabá implementasaun Lei Kontra Violénsia Doméstika. Diskusaun meza redonda ne'e ho tópiku " *Papél autór judisiáriu sira iha implementasaun Lei Kontra Violénsia Doméstika*".

Atividade refere aleinde hetan partisipasaun husi autór judisiariu hanesan Juiz Tribunál Distritál Dili¹, representante Prokuradoria Jéral da República² no Direitór Jéral, Defensoria Públiku³, Adjuntu Provedoria Diretus Umanus no Justisa⁴, funionáriu sira SEPI nian, Diretor husi Ministériu Solidaridade Sosial, Polísia Nasional Timór Lésté, ajensia ONU inklui organizasaun sosiedade sivíl sira.

Iha oportunidade ne'e, Sekretária Estadu ba Promosaun Igualidade iha nia diskursu abertura haktuir katak *objetivu husi sorumutu ne'e, atu asegura asesu justisa ba vítima/sobrevivente sira husi violénsia doméstika tanbá ita hotu hatene katak, Lei Kontra Violénsia Doméstika aprova kleur ona maibe ita lahatene oinsa ho ninia implementasaun ba lei refere iha prátika sistema judisiaria, tanbá ne'e iha oportunidade diak ne'e Secretária ba promosaun ba Igualidade konvoka reuniaun meja redonda atu rona lamentasoins konabá implementasaun Lei Kontra Violénsia Doméstika ne'ebé nafatin enfrenta limitasaun ka dezafiu xave ne'ebé implementador sira hasoru nomós vítima sira hasoru iha prátika lor – loron.*

Direitór Ezekutivu JSMP, Luis de Oliveira Sampaio haktuir katak, *aktividades ne'e sai nu'udar pasu importante ida ba prosesu implementasaun Lei Kontra Violénsia Doméstika, no eventua ne'e importante tebes ba parte hotu atu integra didiak ho Lei Kontra Violénsia Doméstika.*

¹ Dr. Jose Goncalves no Dr. Antonio Fonseca nu'udar juiz estajiadu iha Tribunal Distrital Dili,

² Dra. Ivonia Guterres, Representa Prokuradora Jeral da Republica;

³ Dr. Sergio Hornai, Diretor Jeral Defensoria Publicu;

⁴ Dr. Silverio Pinto Batista

Iha oportunidade ida ne'e JSMP mós aproveita atu apresenta no subliña kestaun esperiensa prátiku ne'ebé halo parte hanesan dezafiu iha kazu ne'ebé partensia ba violénsia domestika ka violénsia bazeia ba jeneru. Tuir monitorizasaun JSMP nian katak, iha prosesu julgamentu ba kazu balun iha kada jurisdisaun tribunal, JSMP continua deskobre katak, maske iha ona Lei Kontra Violénsia Doméstika, maibé artigu 125 iha Kódigu Prosesu Penál sei nafatin sai hanesan impedimentu boot ba efetividade implementasaun Lei Kontra Violénsia Doméstika.

Tuir artigu ne'e, antes hahu julgamentu Juiz-da-Kauza (juiz ne'ebé kaer prosesu) tenke fó hatene ba lezada/vítima atu la halo depoimentu hasoru arguidu ne'ebé sei iha relasaun família ho lezada. Se juiz la halo nune'e, julgamentu ne'e sei iha nulidade⁵. Maske nune'e, dalabarak iha juiz sira nia esplikaun la esplika klaru ba lezadu ka vítima sira kuandu sira ezerse direitu ida sei fo implikasaun saida ba sira nia kazu.

Aleinde artigu referidu, sei iha mós komplikasaun seluk iha artigu 145 no 154 Kódigu Penál. Dalabarak mós iha JSMP nia monitorizasaun relasiona ho aplikasaun artigu rua ne'e.

Hatan ba preokupasaun sira ne'e Juiz husi Tribunál Distritál Dili ne'ebé partisipa iha reuniaun meza Redonda ne'e hateten katak tribunál ka juiz iha obrigasaun tuir artigu refere atu informa ba partes sira konabá saida tuir Lei Prosesuál ne'ebé defini. Se lae bele hetan nulidade tanbá sei hetan kontestasaun husi advogadu ka defensor arguidu nian.

Aleinde ne'e, relasiona ho artigu ne'e juiz sira mós rekoñese katak iha dezafiu boot ida bainhira kazu sira ne'ebé involve kazu ho natureza violénsia doméstika. Ne'e bele kria situsaun ne'ebé la favorese ba juiz atu hola desizaun ne'ebé pozitivu ba lezadu sira. Tanbá se vítima sira nonok sei no laiha tan evidensia ezaminaun médiku husi ospítal sei kria situsaun defisil ba juiz sira.

Tuir iha mós kestaun seluk ne'ebé ligadu ho definisaun konabá se mak nu'udar "autóridade judisiariu"⁶ tuir Kódigu Prosesu Penál. Definisaun ka konseitu ne'e mós sai kauza ba prosesu produsaun prova ne'ebé dalabarak la benifisia interese lezada nian. Ho definisaun ne'e, defini no limita informasaun ka deklarasaun/depoimentu sira ne'ebé hato'o iha estasaun polisiál ser la serve hanesan prova iha ka la konsidera no apresia hanesan prova iha tribunál so apresia deit deklarasaun ne'ebé halo iha juiz no ministériu públiku nia oin nu'udar autóridade judisiariu.

Relasiona ho kestaun hirak ne'e, juiz sira ne'e rekomenda katak ba kazu sira ne'ebé mai ho natureza krimi violénsia doméstika ka violénsia bazeia ba jeneru, diak liu halo denuncia direitamente ba autóridade ministériu públiku nia oin.

Tuir observasaun JSMP nian, diskusaun ne'e sai interesante ba partes hotu ne'ebé partisipa, liu-liu representante Polísia VPU Nasional, relasiona servisu no papel investigasaun ba kazu violénsia doméstika maibé tanbá kestaun tempu, reuniaun ne'e ensera ho rekomendasaun atu iha nafatin diskusaun hanesan ne'e iha tempu sira tuir mai.

Atu hetan informasaun kompleitu kontaktu;

⁵ Artigu 125 (2) Kódigu Prosesu Penál

⁶ Tuir Artigu 1 (b) Kódigu Prosesu Penál defini katak Autoridade Judisiaria, mak Juiz no Ministeriu Públiku, ida-idak kona-bá aktu prosesual ne'ebé tama ba nia kompetensia.

Luis de Oliveira Sampaio
Direitor Ezekutivu JSMP
Email; lui@jsmp.minihub.org
Tel; 3323883/7295795